

## 5.000 ikasletik gora bi eleko eskola publikoan

IRAILEAN Lapurdin, Nafarroa Beherean eta Zuberoan 5.000 ikasletik gora hasiko dira bi eleko erduan eskola publikoan. Iaz 4.781 ikasle matrikulatu ziren bi eleko erduan (euskara eta frantsesa) eta aurten 5.056. Eskola pribatu katolikoan iaz baino 100 ikasle gehiagok eman dute izena eredu horretan, 2.100ek. Seaskan 2.100 ikasle (iaz baino 150 gehiago) izango dira. Datu ofiziala 5.056 bada ere, zifra horrek ez ditu kontuan hartzen Seaskak 2 urterekin eskolatzten dituen haurrak. Bestalde, lehe-

nengo aldiz eskola publikoko ama eskolan, Miarritzen, euskara hutsez hasiko dira irakasten.

## Gipuzkoako Foru Aldundiaren errolda

DIPUTAZIOAK errolda osatu nahi du harekiko harremana euskara hutsean izan nahi duten norbanako, enpresa eta erakunde publikoekin. Erroldan izena ematen duenak, orain arte ele bitan jasotzen zuen informazioa euskara hutsean jasotzeko aukera izango du. Errentaren kanpaina baliatuko du Ogasun Sailak 400.000 gipuzkoarri galdera egiteko, eta Aldundiak

erantzun horiek baliatuko ditu beste sailetarako. Errenta aitoperekin batera egingo duten galderaren zain egon gabe, herritarrek aukera dute euskara hutsezko harremana ahalbidetuko duen erroldan izena emateko.

Ekimen berriaz galdetuta, ondoko erantzun du Zigor Etxeburua Euskara zuzendariak, *Garan* egindako elkarrizketan: “Euskarak ez ditu hizkuntza arrunt batek behar dituen tresna guztiak. Horregatik, sortu egin behar ditugu, eta tesuinguru horretan kokatzen da errolda hau. Guk hizkuntza politika egiteko burujabetasuna behar dugu, askatasuna”.



Honelako albisteak egunero irakurtzeko, jaso hari@DOAN e-postaz: [www.argia.com/harpidetza\\_haria.php](http://www.argia.com/harpidetza_haria.php)

## BAHEA

Euskara agiria lortzetik salbuetsita geratuko diren ikasleez Isabel Celaak Berriari esanak: “B1 maila aitortuko diegu DBH amaitzean, Euskara gaituz gero. Ez dago akatserako lekurik. Egongo balitz, mobiolari eragin beharko genioke, atzera egin, eta pentsatu euskararen transmisioa ez dela eraginkorra izan herri honetan. Hori ezin dugu onartu, faltua baita. Gure ikasleak euskaraz nahiko trebetasun garatuta irteten dira. PISA probetan hori agertzen da. Gure ikasleek ikasten dute euskara eta euskaraz. (...) Gure sisteman ondo funtzionatzen du euskarak”.

Andoni Urzelaik sustatu.comen esanak: “Hasteko eta behin, garbi dago hizkuntza ez duela borondateak efektibo bihurtzen. Borondateak maitekorragoa egingo du akaso, edo errespetagarriagoa, baina ez efektiboagoa. Hizkuntza baten eraginkortasuna espresuki hori bideratzeko egindako araudi batekin baino ezin da lortu. Erdara kaltetuz euskara diskriminatuko duen legedi ausart batekin, hain zuzen. Laguntza publikoak jasotzen dituzten hedabide erdaldunei euskara kuota serio batzuk exijituz, esaterako”.

## TALAIAN

### Korporatibismoa, bankarizazioaren alternatiba

Euskadiko Kutxak eta Ipar Kutxak elkarrekin kooperazio proiektua osatzeko “hizketaldi formalak” hasi dituztela iragarri zuten joan den astean. Integrazioa egiten bada, marka berria bigarren euskal finantza entitate handiena bihurtuko litzateke (25.303 milioi euroko aktiboak), Kutxabank-en atzetik (75.000 milioi euroko aktiboak). Espainiako Estatuko kreditu kooperatiben artean ere bigarren izango litzateke, Cajamar eta Caja Ruraletik oso tarte gutxira, 38.000 milioi euroko aktiboak baititu horien artean sortutako erakundeak. 1.375.000 bezero, 2.497 langile eta Euskal Herrian eta Espainiako Estatuan (Aragoi, Errioxa, Gaztela eta Leon, Kantabria, Asturias eta Madril) sakabanatutako 451 bulego izango litzuke. Integrazioarekin, gainera, finantza erakundeen tamaina handitzeko Espainiako Bankuak sustatutako erasoaldi berrien aurrean blindatuko lirateke.

Egitasmo honetan garrantzitsuena da Euskal Herriko bi kreditu kooperatiba direla, eta biek euskal ekonomiaren sareari zerbitzua ematen diotela. Euskadiko Kutxa sare industrial eta komertzialari lotuago dago, eta Ipar Kutxak lehenengo sektorearekin ditu harreman gehien. Kooperatiben filosofia mantentzen badute –biak hartarako sortu baitziren–, etekin erraz eta indibidualista albo batera uzten badute, eta herri honekiko elkartasun konpromisoari eusten badiote, bankarizazioaren aurrean alternatiba izan liteke. Euskadiko Kutxak eta Ipar Kutxak hainbestetan aipatzen duten bokazio sozialak ea are eta indar gehiago hartzen duen, eta krisiak eragindako sare sozialari, komertzialari eta lehenengo sektoreari laguntzen. Beren kreditu iturria azkar erion dadila –eta ez banku tradizionalena bezain garesti–, batez ere enpresa txiki, ertain eta baserriarrentzat. Kooperatibismoa bankarizazioaren aurrean benetako alternatiba dela frogatuko luke horrek.

Juan Mari Arregi

